

心

知

堂

詩

稿

心知堂詩稿卷八

成都汪仲洋少海

易水集

起丙寅正月迄七月易州作

二歲日顏惺甫夫子

名檢廣東連平人

偕樹厓年丈暨魯輿

秩颿兄弟息廬飲酒用東坡陶驥子駿佚老堂

韻成詩見示依次奉和

秩颿名以照從子受業

今日昨不知明日可依舊人生行樂耳肯待花開後俯仰天地寬何妨室如斗閉門相和酬弟兄亦賢友本無愁可澆况有一杯酒笑謂陶淵明許予同調否

掃地惜春草開軒招白雲白雲飛不去伴我山中人何用拂紈扇怕染元規塵舊德懷明發清風貽子孫未飲

心先酣漉藉頭上巾時復北窗臥居然太古民

附原作

東坡老而愚當時稱耆舊樂天存其真欲追淵明後
我亦疎且癡情不戀升斗琴書以消憂直與古爲友
座聯同心人杯盡春釀酒醉矣聊復眠明日復飲否
居近龍口山山中歸白雲白雲自來去期我作主人
春風亦徐至清絕無纖塵侑觴有笋蕨譁飲偕兒孫
掉頭不復顧餘漚沾衣襟息慮我且息悠然無懷民
十五夜望月與魯興分韻得上字

有情天更春無恨月初望長風吹白雲相與騰空曠圓
靈鑄水鏡憑何肇意匠清光不盈掬江海足磨盪蟾蜍

幾回蝕三五得無恙我欲語姮娥莫照空林孤
雁樓中宵正惆悵

游興隆寺和惺甫夫子用孟襄陽聞符公蘭若幽
甚與薛八同往原韻

咫尺不同居春風綠原野望衡而對宇兩雨皆蘭若

時公

瑞家寓白泉關取與魯
與讀書興隆寺內相去殆里許

逍遙時往還策杖如策馬借問

此何人采藥鹿門者科頭不冠帶說道長松下心性本
空明一切云何捨俯仰識無始愈笑外來假長嘯答自
雲閒身各瀟灑昨日未嘗非今日真是也

附原作

精舍瞰危峰晴窗俯綠野虛濤有松聲清楚聞般若

寺古落蘚苔境幽無車馬撫几揮瑤琴誰是知音者
高山流水心企懷千年下妙義欲與參浮名頗能捨
來結清淨緣始知色聲假君身餐煙霞予情亦瀟灑
寤歌空山中簞瓢晏如也

昨和游興隆寺詩有春風綠原野之句惺甫夫子
嘉賞卽用爲韻成詩五首見示依次奉答

蕭然摩倦眼衣暖始知春寺古雲爲壁山空鳥是隣到
來忘世味都喜是閑人剩有耽吟癖幽懷日苦辛

不緣眞意足安識外來空要識衝寒雁還爲避熱鴻冥
冥雲裏路肅肅羽邊風應否回頭笑銜蘆憶客中

安貧守奇節敦古挽頽俗亦頗嘆艱貞殊難擺拘束好

花皆忘春流水不知綠有璞無須獻何嫌中是玉
琴傳絃指外此調妙難論亦有結廬處而無車馬喧草
光搖藥院山勢赴柴門話到夕陽下輕煙生古原
人憂原憲貧師愛仲由野山石露稜角河流漫傾瀉才
偏與世疎過竟何時寡把臂有同心相將求道者

謂高真

附原作

草木共含新空門亦有春與君同永日喜我作閒人
古刹堪容膝青山好結隣回頭思往事卅載說艱辛
身世皆如夢參禪可悟空心情託雲水蹤跡付泥鴻
試望嶺頭月還吟松下風時光頻過眼都在色聲中
山鳥若相親山僧亦不俗非耽巖谷棲且脫韁羈束

出岫白雲還滿窗春草綠精廬幽以深中有人如玉
一室擁琴樽襟期可共論雲深苔徑滑林靜雀聲喧
但有雞啼午而無客到門登臨饒逸興迤邐上高原
斜陽依遠山清景眺春野濤從松半來泉在琴中瀉
談妙宗旨多境高塵容寡此間是桃源笑誰問津者

賦寄朱炳西外舅

名奎四川成都人

生兒勿爲榮生女勿爲慙衣褐及衣裳兒女兩相乳願
女作人母願兒作人父擇婦與擇夫兒女兩同撫女是
室中賓兒是身後主愛女翻成愁憐兒亦或怒女嫁不
還家兒娶不出戶望兒意原長念女情倍苦兒亦何所
生女亦何所舉倉皇弄孫心得一可歡舞兒半胡然病

女半胡然天叶偏仄垂暮年無端添淚雨區區方寸間酸
辛悲萬古俯仰省生平事可對天數報復竟如斯此理
真難語夜深燈影青夢遍小兒女

雜感

春暉如永託誰解少人憐一片麻衣淚垂今二十年

先

父母以丙午丁未相繼歿鋤來封墓土補到望雲天地下多兒婦依親

比我賢

嫂氏林孀于乙巳室氏朱孀于乙丑

少小無依日饑寒只問兄邇來三十載心跡兩相明夢
裏生春草庭前護紫荊不應千里外流落異平生
性命相依處淒然兩弟昆陳情思辨枉負罪冀全恩天
遠晦行迹夜寒空淚痕願將棠棣樹歸種鵲鵲原

望眼穿雲漢書來怕啟緘死亡原見憫貧賤易招讒貝
錦時還織青蠅老更讒何時秋水落讓出石嶄嶄
盡夜空尋夢無家遠寄書不知三尺土春草綠何如月
落孤魂出山空野祭疏傷心狐與兔誰肯爲驅除
屈原雖有姊殷浩尚無甥食苦心成慣多憂氣更平思
親常惻惻戒弟太錚錚白髮哀離別前年送我情
尚憶從遊訓難回過眼春頑金孤冶氏朽木負雕人落
魄猶餘傲危心不在貧三山瀛海隔何日御飈輪
事過纔知悔回頭補已難中年仍故我萬里又長安筆
意因春瘦書聲變夜寒不知鑪火裏九轉可成丹

洪肇東茂才

嘉春

成都人於武林爲製桃花潭水

主人之筆先並手札見寄旋復郵問及之賦此
志感

後緘忽比前緘疾萬里得書如得筆前緘更比後緘新
一朝見筆如見人雞距鼠鬚何足惜遠自江南寄燕北
蠅頭小字青鏤管當時况是親題墨仰首含毫低首吟
落紙忽作春蠶聲東風亂送桃花雨不見故園空復情
情欲絕歌初苦走上金臺望平楚離寄餘一身形影迭
賓主篋裏中書心事違及鋒而試不如歸

山夜獨坐

空山春夜裏獨坐忘移時簾月通書案瓶花落硯池香
能浮裊裊影竟走絲絲一片淒清意無人祇自知

和魯輿送春

君言人送春我言春送人不見古時人曾憐今日春黃
金高北斗難買百年身相持一杯酒縱浪雨齊民得過
不空過庶幾葆天真

奉和惺甫夫子晚步溪邊觀漁原韻

落日滿溪晴漁歌時一聲沙痕隨水沒山勢趁人行未
到臨江處先深結網情使君聊示意魴鱖不須驚

奉和惺甫夫子見題臥遊山房原韻

亂山如瘦龍飛身出雲半怪我乘風來矯首雲外看流
泉濺浪花藉作驪珠玩中有維摩室圓光啟暮旦於茲
相憩留禪榻雜書案得酒坐娛日不惜金貂換杖履話

生平低頭付一歎幽人忘時序何必問懸炭

附原作

一山插雲出寺在山之半衆山環寺來山在寺中看

中有幽人居

卽少海孝廉讀書處

臥游供清玩山色分晴陰雲容

幻昏旦松柏蔭軒窗煙霞入几案開襟清風俱倚檻

啼鳥換讀書還鼓琴一唱復三歎悠然恬澹懷此間

無冰炭

臥遊山房和惺甫夫子見示原韻

一雨衆山碧嵐氣侵裾涼坐見門前水來往人褰裳迴
風淒以動草木生清香卽此暢懷抱浩歌天宇蒼

附原作

澹雲散微雨高寺生新涼披懷對君語清風吹我裳
樹靜飛鳥下窗虛野花香禪扉無塵垢但見青山蒼

壽惺甫夫子五十

脫却朝衫著布衣欣然對客數罍圍無心出岫雲還入
有力培風鳥再飛盡道愛蓮新著說誰能御肉舊知非
他時弟子如今日更爲先生頌古稀

雨後聞蟬和惺甫夫子原韻

欲雨風先作山腰雲亂生旣雨雲未散山頂日先晴空
林瀆餘滴隔簾時一聲不知何處蟬入耳偏淒清與秋
相終始慣作不平鳴承蜩亦有道病僂遺世情

賦呈惺甫夫子一首

瞿塘破浪走棧道連雲行山水有奇氣寸心相與爭當時記所過往往抒性靈信筆逞豪快殊非正始聲海上遇夫子劇來移我情絃外有餘韻妙處人不驚一唱而三歎泠泠天地清由來太古懷萬事歸和平願念斂馳驚庶幾葆令名

次韻惺甫夫子見示一首

漫數落花落遙看飛鳥飛詩多難入選客久不思歸薄命名心澹中年酒力微憶從操几杖狂簡漸知非

惺甫夫子招食苦瓜並示以詩感賦

西南金火墟食物多辛苦抱甕而荷鋤當時有瓜圃綿綿長蔓縈點點素華吐半架疎陰中玲瓏日如雨炎歊

五六月摘食佐雞黍徑尺潤濃綠非瓠亦非芋上有離
離珠大小紛難數至味不娛口清香自太古飽嚼宜幽
人秋風生肺腑

心情本澹泊嗜好皆尋常河朔得鉤瓢良如歸故鄉煎
煩活火細煮用流泉香舉筋未及下雨眼生清光薄飲
佐樽酒微吟成短章詩若古琴曲酒如寒玉漿與瓜爲
三絕厥味同一長總在酸醎外由人深淺嘗

惺甫夫子見題易水集次韻答謝

蜀客遠自我眉來兩腳踏亂浮雲堆陳倉道口忽平地
中原萬里低黃埃長安索米非得已疲驢破帽相嘲哈
筆陣排成入矮屋揮毫力與千人偕古調獨彈韻彌遠

急絃催鼓音難諧屏棄不入釣天樂空然淚下雍門哀
西風打面塵幾寸無顏更上黃金臺欲學狗屠屠狗去
當筵擊筑銷壯懷青山飛翠入城市隱隱招我兜芒屨
遂遇仙人白鹿背石乳釀酒傾樽罍虬松古柏溜煙雨
驚心認似黃花槐低頭太息遺身世間雲恣意畱山隈
時從蒲團聞妙諦隨風咳唾皆瓊瑰授受長生總夙分
追隨不死真同儕英雄解脫類無用刀環劍匣生莓苔
磐澗嘯歌各有得喁于唱和斜陽開公如澄江澈底見
秋色一碧萬頃流潏潏我如溝澮皆盈勢易涸方當雨
集轟成雷就下性同雨相合清濁大小誰疑猜奔騰疑
有蛟龍搏澹定渾忘霖雨材我行未得望洋歎公行已

自輸海回六斗泥沙四斗水此事淘汰公何裁

張船山侍御

諱問陶四
川遂寧人

惠寄便面上畫牡丹一朵并

繫以詩次韻答謝

齊紈妙製無雙譜小扇香開第一枝聊藉好花傳氣韻
偶從佳句見丰姿名成絕代防人妬色縱傾城願自知
我是芙蓉江上樹春風廿四苦參差

次韻惺甫夫子見贈二首

笠屐人忘前節度丹鉛我仰大宗師良惟古法才經世
詎有名卿不解詩一卷手持消永日廿年心瘁佐明時
由來進退無慚甚莫怪酣歌樂未移

空山茅屋互爲隣一日歌詞一日新疎雨有無皆節奏

片雲舒卷亦精神
憑心自願堪傳道
藉手何能作替人
回首邇來差共信
漸消豪氣欲歸真

附原作

蕭然笠屐樂栖遲
竟是枯禪一退師
我輩讀書原曉事
古人餘藝亦工詩
閒鷗野鷺無猜意
流水高山有會時
寸管自持還自笑
少年結習未能移

偶託精廬結近鄰
佳章惠我擘箋新
山中風雨欣相共
筆下煙雲若有神
回首甯多如意事
知君終是出頭人
他年勉立千秋業
始信論交氣誼真

寄懷張船山侍御

頻將尺素問如何
瞥眼懷人半載過
酒禁未妨寬太白

詩名誰解累東坡官躋亞相依然冷諫切明時不在多
莫便看雲勞遠夢春暉無恙照岷峩

奉答惺甫夫子六言四章

笑我學從夫子源流變易非同閒若輕鴻戲水快如怒
馬奔風

胸中怪石交撐紙上驚濤亂瀉如何出峽詩成不似聽
猿淚下

非云筆可如刀總爲山能似劍千年意匠爭奇一樣鋒
鋠不斂

歲月回頭易負山川到眼難忘寫到夔門劍閣時時如

在家鄉

往時下峽出棧二集多有
未備今年逐一補吟之

感逝

歡娛在往日夢裏翻相忘生死及茲異翩其來夢鄉悽
然萬事理變易紛茫茫我昔亦非有君今原未亡如何
一寸心耿耿殊蒙莊摩挲孤琴在上有古錦囊已字迴
文織長畱機杼香從今鼓別鶴不復彈求凰

寄懷劉芳臯比部

名曙四川
溫江人

年華回首太匆忙握別頻驚兩鬢霜幾日春風鬪紅白
將秋木葉變青蒼論交自要憑眞性解事無須盡熱腸
食客君家原不斷當筵少却次公狂

送別惺甫夫子奉

詔赴南河辦工

行旌計日渡淮流我亦飛心到蔡州萍水雪泥空念別

東西南北愧從遊依然食客畱門下轉送先生走道周
此去小山叢桂裏因風爲寫一枝秋

見玉簪花姜感賦

一朵天然白玉簪亭亭季女小牕陰生原解語惟緘口
死爲多愁不展心倩影可憐隨月沒離魂無奈到秋深
回頭抱甕疎防護枉向斜陽淚滿襟

三春錯却惜卿卿冷雨斜風過一生惟有夢魂偕我老
更誰丰韻似君清天孫解脫餘金釧月姊飄零返玉京
寄語故園諸舊識落花無主最關情

劫火吹空墮赤鳶好花誰與駐華年莊嚴淨相原宜佛
綽約清姿太近仙多爲有情生此世不應無故斷前緣

一莖更共何人賞滿院秋蟲總悵然

羞他桃李鬪春紅綺袂青裙一昨逢纔愜性情天便妬
不隨流俗世難容惺忪雪魄應憐我憔悴風鬟最懊儂
未卜葬花歸有日殘香可許手親封

易水行

燕南垂趙北際中央不合大如礪時清誰人肯避世朝
來拄杖五華樓醉眼橫吞天地秋但見一片蘆花外無
情易水蕭蕭流易水流不已悲歌聲欲起黃金不鑄望
諸君白衣空傳燕太子燕太子送荆卿銅柱博來刀一
聲吁嗟乎死負樊將軍生負田先生

重過易州

青山高下水滌洞百尺孤城殊壯哉白馬尚傳長史騎
黃金誰上古燕臺強隣不合逢袁紹得士何如自郭隗
我亦悲秋能擊筑無人屬和自低徊

重渡涑水

蘆花厚於雪西風吹不起野渡無橫舟瀉地但秋水茫
茫白何際了了清見底雲濤生馬蹄浪雨打人耳波面
雙紋痕浮車亦同軌中流四顧盼居然河伯喜吁嗟易
盈涸豈是天下美彼岸如容登回頭一綫耳

涿州懷古

異時車蓋取樓桑竟未歌風返故鄉數扼雄圖殊世祖
天教大度似高皇生兒覆蜀魂應痛垂老吞吳願未償

四十餘年綿漢祚
惠陵雲樹隔華陽

心知堂詩稿卷九

成都汪仲洋少海

春明集

起丙寅八月迄己巳八月都中及保安作

落葉

夕陽滿芳樹渾如霜葉赤霜葉映明月翻疑芳樹碧
竟夜搖寒煙露花相激射淒然時有聲委地已如擲
同生天地間誰非秋風客未知園裏人能掃幾回葉

無聲秋氣寒木葉紛已脫縱使畱枝頭生機嗟盡奪
何殊年老人神亡皮骨活人老不復少葉落甯再春
綠葉接紅葉今人連古人由來百世下俱是後來身

萬古無榮落泰山松柏青仙人王子晉倚樹捫天星下

視九州裏大夢春冥冥冥夢不醒匆匆事多迫秋風
掃空林年命同一擲人願爲神仙樹願爲松柏

聞川西川南今年疫氣大行武狠新兵作難阻塞
棧道久不得家兄消息遙有此寄

年來烽火遙相望川西川南幸無恙貧人有子從軍行
富戶有錢助軍餉感戴百年

明聖恩各出微力不相讓如何厲鬼妬安閒兵災不到
從空掠我久不得伯氏書但願流離未死喪吁嗟乎但
願流離未死喪他時猶及淚相向

此屬曾爲王者兵衝鋒陷敵邀功名已慣殺人思自殺
持刀掠野于天刑將軍昨入函關道賊膽先搖擊鼓聲

三岔驛口密防竄兩角山頭高駐營楚蜀雄關扼四面
有如大釜烹鯢鯨滅此何難待朝食一箭射落蚩尤星
吁嗟乎一箭射落蚩尤星還鄉重歌棧道平

諸城單貞女八十壽詩

潔莫若瑤池冰清莫若古井水瑩然貞女心方寸亦如
此憶昔少小纔垂髻明珠一顆深閨裏不繡鴛鴦與鳳
凰愛傍紅燈看青史慷慨噓唏思古人將身自比北宮
女不字終非父母願十年乃屬隴西李青鳥初傳五色
書采絲未合長千里秋風一夜從空來庭中佳樹折連
理泣血欲絕哭聲低洗盡鉛膏屏簪珥未娶何能識夫
面已聘終須執婦禮誰云妾身未分明不可登堂拜姑

姊父兮母兮當憐兒勿令援刀兒斷指遂載栗主來親
迎入門一痛成婦矣蘋蘩采就羞鬼神機袖織來供甘
旨所撫逾所生是姪卽是子妾縱未亡疑已亡夫雖已
死如不死當年十八一片心今年八十心尚爾螺髻未
改女兒粧蕭蕭白髮垂過耳吁嗟乎柏舟誓黃鵠歌此
事古來皆不磨已嫁未嫁賢孰多

得惺甫夫子書漫賦

紙上離情認墨痕江南咫尺便銷魂寧知萬里黃雲路
更要匆匆出玉門

得陳芝山夫子書

名達紀四
川金堂人

燕臺萬里隔琴臺忽見錦江雙鯉來點易毫端迴日月

談兵舌上起風雷更無腐史傳儒俠空付馮唐說將才
我是故園桃李樹直從萌蘖費栽培

東家雨園太史

名園之浙
江錢塘人

樽前底事意低徊同是越王樓下來兩處寄家隣禹穴
一時遊客傍燕臺支流已遠偏相睦世數難詳亦可哀
欲問何年衣畫錦桃花潭水踏歌回

連朝握手話鄉關越國梁州夢錯還錦里花搖湖上月
錢塘潮湧棧中山蘇公撥棹六橋裏陸子騎驢雙劍間
願與得名如二士不須遊歷遍人寰

漫怪文章海內尊吾宗原是魯諸孫黃山與我同中葉
黑水偕君是後昆屐底槐雲秋有迹衣邊杏雨晝無痕

鴛鴦好度金鍼法莫與旁人一樣論

故鄉消息聽難真劍外爭傳戰鼓新
羶穠無依慚下第
干戈未執負成人防秋欲擬安邊策
過夏空爲入幕賓
不識西川韋節度可教歸作太平民

趙北口

十二采虹飛入水萬頃琉璃煙不起
風帆一葉翦波過
人家墟里在舟底此水從何來河隄
今歲開此水從何
去海口去年淤居民娛樂不吝嗟
稻梁漂沒餐魚蝦

白溝河懷古

白溝輕割似鴻溝不取燕雲十六州
誰信北征揮玉斧
已教南渡棄金甌陳橋有變孤兒泣
澗水無情寡婦愁

看到覆亡同一轍始知開國要全謀

咏劒

繞指柔須百鍊剛夜深誰令露光芒纔從季札除豪氣
忽爲荆軻動熱腸鍛冶不緣人可否磨礪權與世低昂
延津莫化飛龍去冷落無因七寶裝

臘月八日索粥於芳臯比部

家無二頃田慣食顏公粥見客呼雙弓終年不鼓腹欣
逢浴佛時黍豆雜魚肉隔夜辦山廚清朝啜饘鬻榆錢
五味香桃花七寶熟頒惠及隣翁適口殊脫粟餘者貯
沙瓶尚可十日卜自從牛馬走風味杳難續夢裏懷故
鄉饒涎醒可掬公我同里人此情相感觸前日餽蘭豬

昨日送燒鹿早知賢內君烹調擅庖屋胡不煮羅閣分
甘飽賓僕

芳臯比部邀集諸同人食粥已而主賓皆醉仍不
及食戲疊前韻

聚飲苦無名唱言食糜粥糜粥亦酒材不醉旅人腹未
若傾巨觥相將擘乾肉陶然一席上各自得天鬻爭言
白酒甘那問黃梁熟銀海未生花玉樓先掃粟大力回
陽春不用斗杓卜射覆事纔終藏鈎令重續拇戰更囂
然紛紛指可掬乾坤一蝸角今古幾蠻觸失意便驅魚
乘機先逐鹿但見玉山頽餘甘香滿屋數典而忘祖笑
殺兩家僕

東石甫

風塵流落兩長鑱一是江南一劍南
豪氣未除君尚可壯懷全減我何堪
龍蛇進退思方朔齒舌剛柔憶老聃
空有俠心無俠術英雄耐可酒初酣

紀夢與魯興

一種疎狂不解愁醉眠長在酒家樓
宵來好夢添詩膽海外回頭數九州

陳鍾溪夫子以山西學政任滿還京賦呈

五年離絳帳千里想橫經得夢縈河曲
飛心度井陘水搖蘭槩綠山人馬蹄青
失喜今何夕長安拜使星

室列春風座天當立雪時那堪頑弟子
重侍大宗師望

負魚龍變心餘鳥雀癡素衣淪落久不敢化爲緇
積水由能下培風不厭高未搏羊角旋安問海門濤俠
骨緣秋勁名心藉酒豪酬恩尚無日終夜首頻搔

題惺甫夫子西行草後

是翁矍鑠據征鞍已慣馳驅不畏難諫獵馬卿非過激
罷官黃霸只緣寬龍沙有路驚心遠雪海無波照膽寒
拍遍蘆笳秋夜永孤臣垂老要加餐

黃沙白草氣蒼涼飲馬長城欲斷腸春半束裝過瀚海
月明回首憶江鄉琵琶調急人皆泣簞簟聲寒夜有霜
愧不從遊俱萬里穹廬相對話邊防

西游不肯變商聲日有新詩當紀程貢馬使來光祿塞

射鵰人住受降城周家遣戍多風雅漢室屯田用老成
聽到笛中吹折柳黃河源上望燕京

不導河源不破戎聲聲戍鼓響邊風翻因偃息成詩老
暫合顏唐號醉翁客舍築時來社燕家書裁就付歸鴻
誰知兩地欣無恙萬里青山一夢通

不待提戈出玉門吟情落紙便雄渾雲黃雪窖秋鵬起
月黑榆林夜虎蹲渡海昌黎綠吏議還朝定遠埃
君恩葡萄好種今須種絕塞天寒藉酒溫

鏡裏秋霜兩鬢皤當時諸老更誰過城鳴鼓角燉煌塞
草沒牛羊勅勒歌鄉思久因萸菜熟客愁應比酪酥多
田家笠屐歸來晚雨雨風風奈若何

得惺甫夫子見懷詩寄呈二律

匆匆祖餞不多時，掉首都成萬里思。
未敢重談天下事，何能輕和別來詩。
文章到老公尤健，閱歷無常我亦奇。
門裏燭花門外雪，愁懷惟有瓣香知。

十樣蠻箋卅字交，新詩一一寄推敲。
從遊我不如唐佐，念別公猶及孟郊。
錦段難酬青玉案，春光願度綠楊梢。
懷人日有刀環想，手把靈蓍問六爻。

送別楊以庸

長安低首撫刀鐔，我亦天涯人未還。
三十六峰青欲落，爲君從此夢黃山。

驪歌淒楚問誰堪，但覺旗亭酒不酣。
楓葉脫時秋水濶，

一聲柔艣到江南

戊辰六月朔日有感

破鏡真成恨孤琴祇自憐
羈游仍萬里死別已三年
事久心逾碎人遙夢不圓
青衫憔悴甚誰助辦裝錢

出居庸關

誰將巨掌擘鴻濛石穴纔能一騎通
隘地斜趨三輔外長城廻合萬山中
吹笳自昔愁無那飲馬何人怨未窮
不見懷柔當有道書生傳食到宣同

塞上風雲不肯銷關門啟閉在山
罾葡萄熟後征人醉苜蓿肥時戰
馬驕絕域一身蘇屬國平沙萬幕
霍嫖姚將才使節俱無用四海而
今翊

聖朝

土木

一片笳聲起黑雲悍歸天意更何云當陽不用鬚眉佐
復辟仍爲傀儡君扣馬約忘于少保奪門功念石將軍
低徊恨滿邊城路瓦礫荒涼接夕曛

沈青霞先生祠

當年被謫走邊陲小縣荒城尚有祠國賊未除安問敵
奏書難上更吟詩奇驚末俗人思殺孝感嚴君世鮮知
白草黃沙風雨夜反騷無計活湘纍

燕然山

燕然山色鬱蒼蒼此地曾爲古戰場班氏才華餘史筆

漢家功業半椒房邊城野草連天白塞上秋雲匝地黃
勒石不知何處去也隨炎運付滄桑

保安雜咏

邊笳聲裏夕陽低落葉成堆沒馬蹄土阜周遭圍一桁
軒轅城在坂泉西

上游分水溉平田不用龍車引急湍記得路從沙裏過
居人指點說桑乾

大唐天子記東征駐蹕青山錫好名我欲上尋劉越石
五更來此聽雞鳴

三峰翠影湧平沙筆架何如易少華神禹主名題不到
無人解道是蓮花

游仙夢裏少登攀
倦眼摩挲夕照間
兩朵白雲飛不去
大礬山與小礬山

新詩日日自吟哦
到眼山川不放過
九十九泉煙雨裏
何人笠屐畫東坡

李二義招飲卽席有贈

二分明月一聲簫
家住揚州廿四橋
展轉有心郎不識
春風吹上美人蕉

趙菊嵩招飲不往賦寄

名盛奎直隸深州人

海內論交氣誼真
寒酸誰耐守頭巾
非緣寡過殊前日
縱欲多情讓故人
病酒偶然思斷酒
傷春無奈怕尋春
桃花只隔盈盈水
孤負東風不問津

秋夜東子范

詩能寫怨唱難好酒可消愁活不成秋竹一竿風悄悄
滿城明月擣衣聲

落拓人間萬事非相逢總覺素心違羽毛憔悴倦飛鳥
風雨滿林何處歸

秋夜東魯興二首

一片梧桐月流輝照弄琴衿衣沈夜氣蟲語繞秋心此
別亦非久相思殊爲深夢魂欣不遠持以問知音
木葉脫如雨秋聲何處風遙從天地外吹落寸心中獨
夜無長夢繁星滿太空不知河漢轉引領失西東

十五夜望月寄懷故園諸子

懶從皇古後歷歷數虛盈明月原無恨青天最有情梧
桐秋半樹河漢夜三更不識披長髮何人正跨鯨
我欲凌空去全家住廣寒圓光開萬古只在月中看照
白夜烏項浴青東海瀾故人多不遠分影對團圓

中秋夜同魯輿對月作長句一首卽以畱別

彈指流光駒過隙五載君家作食客其間聚散紛離奇
未得相對中秋夕今年良夜君偶同明發歸期我又迫
人生歡會能幾何如此佳期不易得昨夜月漸盈前夜
月微削預擬今夜月圓如垂棘壁曉來簷雨聽瀟瀟低
空雲氣照窗黑秋聲慘澹愁殺人今夜無月眞可惜誰
知得失轉眼間陰陽九道紛闔闢驚有風從東北來飛

廉持扇扇入極橫吹雨脚如散絲亂捲雲頭似堆墨須
臾淨掃寒空出萬里長天只一碧此時待月意徘徊走
上高樓望碣石但見雲海東復東瑞光隔水時一擊潮
聲漸高光漸滿銅鉦飛空海水立卻將大地山河影倒
攝鏡中不下擲不知望月誰欣然仰天大笑手相拍低
頭忽訝鳳城中萬瓦鱗鱗霜雪白仙乎仙乎我欲狂有
似冰壺濯魂魄忽憶來朝隨月西裁眉半輪秋悽惻未
知何時隨月東與君重上樓百尺

賦呈惺甫夫子十首卽用萬里真成別三年苦憶
君爲韻

鵬鳥徙南溟天風翔九萬雲路一何遙所欣羽翮健夫

子昔有行不作玉關怨慷慨飾車徒從容加餐飯紆途
召我來疾驅從公進擬作荷戈人禦侮列行陣擬作記
室賓參謀備問訊公曰俱無庸是非予所願

所願夫如何事有大於此家無應門童親眷寄燕市行
無百日糧佳兒在攜李兒婚有成議諏吉恐中止家計
無長物養生何所恃願子勸兒婚螢雪習書史願子代
家謀簞瓢安菽水再拜領公言低頭淚如雨

淚雨忽霑臆酸楚難重陳自我走京洛骯髒惟一巾衆
人惡疎放公獨愛其真熱血澆肝膽士爲知己親不覺
縱橫氣黯然多苦辛驪歌數聲動愁絕車麟麟臨歧一
分手遂作天涯人此心同周道輾轉碾雙輪

車輪碾方寸時時從公行玉門一迴首蒼蒼煙樹橫吹
笳啟關出但見黃雲平曠絕少人迹欣然聞鳥聲天山
雪積就瀚海沙生成歷盡奇險地吟成邊塞聲當公到
戍時我亦魂夢更形骸隔萬里晤對如生平

平生無所好俯仰自怡悅秀色離風塵清懷合冰雪少
小多艱虞中年更蹉跎椎牛祭未能望雲自嗚咽曲慰
勞師心訓言記臨別毋因垂翅墮羽毛日摧折毋因點
額歸鱗甲日壞裂銘心永不忘珍重生花筆

生花筆何有游仙夢正酣天上玉麒麟

謂魯興

把臂弄青

藍對案蘸秋水分聲走春蠶誰能骨通靈造化一腕擔
書罷一長嘯心與義獻參落日登高望西山飛紫嵐屈

指別來日更番歲易三

三歲千支換計日惟兩年馬頭數明月二十四回圓舉
朝誰爲請

聖心自拳拳持節付羽林萬里召公還玉門快生入淮
海佐防川

帝曰咨羣牧食廼民之天太倉苦紅朽肖職人良難更
頒五色詔命公來幽燕

公來不俟駕樓船發清浦船頭拽長綽船尾繫大鼓船
署挂滿帆赴闕如風雨我出春明門迂公潞河渚心準
疇昔顏未知老幾許髯戟雪星星鬢絲霜縷縷矢聲雜
笑啼撫念回甘苦彈指一夢間變幻紛難數

人生一大夢勞勞何時息來者殊未知去者不須憶澹
泊功名艱虞積道德鼎鼎百年內但期中有得我欲
長追隨自東西南北庶幾略成就不負生理直及身多
未了憂患苦相逼傷哉我眉山化作望夫石

我眉如美人羣腰五色雲未有胭脂井起作桃花墳東
坡因通義迺聘同安君姊死而妹繼多情思古人相如
家成都四壁皆風塵不歸心滋戚欲歸心如焚解囊資
葬妻此恩生死均無以報知己長言抒性真

心知堂詩稿卷十

成都汪仲洋少海

入棧集上

起己巳八月迄九月道中作

出都後馬上口占寄諸友

幾年花雪聚燕臺握手都從故國來忽爲疎狂嚴酒禁
肯因貧賤減詩才三秋紅葉隨人落一路青山送客回
不信望洋空太息飛身無術到蓬萊

涿州曉發

忽訝林煙重低空水氣垂曉寒衣袂覺沙潤馬蹄知故
國一何遠歸心相與遲漏天殊未到愁絕雨絲絲

白溝早發

客路爭先發車從夜半馳輪音相輾轉銓影互參差霧
雨終宵暗霜花破曉滋安心無別法途遠且吟詩

車中

故鄉不可到迢遞坐輕軒兩朝牽詩思雙輪碾夢魂歸
心餘鹿鹿倦眼只昏昏望斷天南路肩輿入劍門

新樂道中

昏昏雲樹莽中原隱隱人烟露遠村滿地珊瑚紅不網
田家秋色聚蕎根

河千秋水綠於醅轍路遙從水底開滾滾雙輪如蕩槳
浪花掀過馬頭來

落葉未知黃似酒蘆花無故白如雲西風一夜聲蕭瑟

染得秋光到十分

欲授衣裳九月天
砧聲到處響寒煙
如何草際星星雪
尚有人家未揀棉

定州古中山也弔慕容垂

漏網鯨魚縱海濱
脫韉鷹鳥掠風塵
衰年逆節慚姜讓
故國開基倚翟斌
河繞滑臺兵唱凱
山圍參合鬼飛燐
儘饒餘智探囊底
可惜驅除爲別人

眞定府

當時不識顏平原
亦不識有顏常山
一旦赤心人忽變
烽火照入函谷關
琅邪仙人執節起
河朔響應數千里
咄嗟守備猶未完
黑雲壓城氣皆死
礮車打斷常山蛇

塞馬飲乾滹沱水矢盡食盡臣力盡不義之屈男兒恥
肯學哥舒呼聖人先事睢陽報天子舌上熱血如鋒鏑
飛空直欲斬安史禍亂相尋思其源前有楊釗後盧杞
使者長安幾日來從容就義亦如此吁嗟乎常山難爲
兄平原難爲弟

滹沱河

南陽天子人中龍二十八宿如雲從更始既立王郎起
匆匆未渡滹沱水是時天寒河欲冰濁浪無花沒有棱
効靈河伯咄嗟辦未畢數騎倏已陷麥飯豆粥倉卒間
大樹撐開中興天澠池積甲齊熊耳功與赤眉相終始
厚意未報如故人區區封侯何足論君不見韓彭蒯醢

事高祖一飯君臣愧光武

邢台古之襄國也弔石勒

高光之際自評論鞞鐸常隨礮落身少日饑寒資郭敬
中原攻守問張賓傳聞廐馬真生角記得園蓀解肖人
大雅悵悵空付託可能周霍是純臣

邢台夜發

匝地流水聲破空撼客夢心疑夜半車凌波走磬控塞
簾見明月滿地樹陰動夾路皆白楊西風戰相闕乾坤
氣蕭瑟日夜響瀕洞野鬼愁不眠燐火時一弄明滅倏
西東行人笑遲重大化何茫茫吾生任狂縱

磁州杜城鋪道中

滿畦流水綠如煙也
有人家種稻田穀穗垂時
勸板急苦無脩竹似西川

鄴下懷古

銅雀臺荒漳水東
瓦當分貯墨花濃
生逢亂世稱周德
死欲欺人署漢封
一代姦雄眞落落
千秋疑冢自重重
鞭屍總爲藏舟拙
笑煞中山石季龍

矢石餘生恣遣排
香渠百道出宮來
芳塵黏雨空濛裏
玉壁珠簾迤邐開
照首有時驚大鏡
滌腸無術念純灰
誰知棘子成林日
似我還貽果羸災

乳燕毛冠兆瑞初
一家才武更誰如
公和雅意師姬旦
卻缺何心學伍胥
才子當筵頻歎息
將軍鬻水足軒渠

沼吳棲越尋常事會見羣羊再負魚

踰牆能挾石後猊雅量宏才不遇時家事歸乎眞跋扈
癡人差未太凌欺虞賓載詠山陽贊秦帝難忘謝客詩
步就東廊成禪讓雲龍門外犢車遲

富貴何爲到此人河邊殺慙竟稱尊投孟雅欲吞關隴
滅騎猶能截塞垣漫罵龍逢非俊物空憐伯有剩游魂
三臺殿閣都灰燼馬射繁華莫更論

車如舟

一驢拽一人推一輪轉一帆飛使車如舟茫茫何之風
沙雨雪南北東西八月糴麥二月收絲眼中飽煖療不
到身上寒腹內饑舍我車與驢而更將奚爲

韓魏公故里

日下雲光五色重
殿前臚唱到韓公
人如周勃兼文藻
才過姚崇有武功
義勇防秋千里外
元勳顧命兩朝中
宵來櫪馬驚星落
晚節香畱老圃空

衛輝旅次有懷武我堂孝廉

鴻泥回首幾經年
下馬重來只悵然
一昨旗亭分袂別
更誰風雨對牀眠
無多酒友都成夢
不盡詩魂欲化煙
忍向銀箏重問訊
月明彈斷十三絃

九日旅次寄家兄載菴

菊花何處淺深開
冷落重陽酒一杯
絕塞雁聲從北度
太行秋色自西來
鄉關尚隔三千里
客路難登百尺臺

莫把茱萸增悵惆計程歸及隴頭梅

清化鎮

我家芙蓉城門臨浣花水十萬青琅玕日夕竹煙起自
從走長安坐臥黃塵裏欲見蒼簋根何啻瓊花藥及茲
河朔歸刺促負行李流泉清淺間倒影皆鳳尾嫋嫋情
何限離離恨無已昌谷不可作煙露誰爲洗倦眼開昏
昏空翠撲心喜安得移此君與我共行止不爾歸故園
更勿作游子

河內

素衣淪落緇塵染放眼都歸馬上吟萬里黃河穿地脈
中原嵩室貯天心登雲我欲窮高下到海誰能測淺深

八
矢
言
卷
一
形勝莫如收嶽瀆鴻溝酸棗不須尋

黃河

莽莽下崑崙黃流萬馬奔乾坤容跌宕滄海識雄渾水
氣成銀漢濤聲在孟門何當封博望萬里訪眞源

自孟津至洛陽

土山中坼裂一線走黃埃路壁蜂窩入人穿鼠穴來周
書餘洛誥漢業有雲臺欲問興亡迹河流萬古哀

洛陽

陰陽和會啟鴻濛河嶽英靈迴不同才子文章推賈誼
黨人名姓重溫公湘纍自况長沙去新法重行紹聖中
終古北邙無限恨九原相對作幽宮

銅駝荆棘幾迷離勝地依然似舊時設難屢摩班固賦
題名爭認陸機詩山銘朔漠功原大鶴唳華亭悔已遲
不信文人兼武烈蒼茫異代竟同悲

雒陽行

肥王縋城夜出走流賊已圍伊闕口不須小放更大放
有人城上暗招手開門大會凝碧池打亮高斟福祿酒
藩封却憶分圭初國本廷爭歷年久如意當時倚戚姬
仁宗猶未識宸妃更無寇準承清問但有王陵費諫詞
金珎賜佩危機露玉合密誓無人知太后調護本家法
孝肅慈聖相依稀兩宮告竣神宗喜冊立長者義良是
故事不取霍光傳儲君仍是都人子驀遣張差挺擊來

特用朱賡竝議起田叔治獄盡開脫程據和藥誰王使
青宮太弟兩虛願鬱鬱東都豈得已婚費邸第踰常經
莊田齊楚遙輸徵鹽井利向他山奪荻洲稅指沿江爭
射賊不用周王箭登陴還招楚府兵夜半城樓火光起
倡樂叢裏醉魂驚隻屨無端墜戶牖泥首依然入鼎俎
罵賊抱愧呂維祺逮治空誅王紹禹承奉兩人挽斷車
桐棺一寸入黃土餘算別啟小朝廷覆巢完卵疑千古

函谷關

重關百二峙雲中隘地初驚一線通霸王乘機爭出入
山川趁勢挈西東雞聲日夜人將老馬足風塵路未窮
此去好尋秦漢迹咸陽煙樹遠濛濛

將至硤石驛

滑滑蹄聲馬不前盤雲細路欲侵天歸心忽爲青山喜
略似郎當到武連

崤谷道中

崤函西上指咸京一線青天照客行王穴縱橫眞險地
人煙出沒類奇兵空憐晉室乖原軫幾見秦家用孟明
戰迹茫茫尋不得二陵風雨鬱秋聲

入潼關作

面列終南背太行潼關四扇鎖中央黃河水落蛟龍蟄
華嶽雲開虎豹藏天地英靈原有主山川形勝總無常
義軒舜禹殊畿甸豈必咸陽是帝鄉

楊太尉墓

講堂冠雀賀君升潼亭大鳥弔君死道傍墓表何巍然
關西孔子楊伯起爰劉大業傳蒙孫生長深宮未出門
封侯不遵高祖約通路惟酬乳母恩女寵驕橫寺人侈
詐下詔旨修新第太尉部掾遲發奸河間男子早棄市
蹇蹇王臣遭反噬慷慨飲酖報安帝桑榆影落夕陽亭
雜木棺中蓋布被華陰改葬安忠魂賴有門生頌前事
吁嗟乎四世清德躋台司羣小接踵多誅夷彈指往事
更何有但見石鳥如當時牧童樵子夜深過往往側耳
聞悲啼羣小縱恣公孤死漢家家法恒如斯君不見恭
顯常迫蕭望之

王景略墓

景略在苻秦昌景略死苻秦亡正朔相承言在耳如何
投鞭斷江水陣後一呼百萬潰鮮卑羌虜紛紛起逆計
前知如聖人太公諸葛真堪比垂釣渭水耕隆中嵩高
貨畚將母同却憶螭蟠布衣日伊誰冷眼知英雄徐統
功曹枉召命桓溫都護空牢籠捫蝨不顧披褐走咨師
之誣由崔鴻巖栖心似蓮花淨太華頂上無捷徑薦賢
多事呂婆樓服官初試始平令拔韭破柱才原豪檻車
下獄氣空橫倘使斯人竟廢黜何由舉國臻強盛肩頭
肆赦更超遷席卷關東功爛然葑菲無遺魏犇奮恩怨
分明法正專魚水君臣何灑落郊廟親祈眷寵篤謀略

能教霸業成度量或致年華促當時秘器頒東園葬禮
依漢大將軍一坏土內無遺恨生子猶能滅後秦

重登西嶽廟萬壽閣

尋仙五嶽一枝筇未上高寒落雁峰萬里風塵辭漢時
六年煙雨想秦封明星墮地眞成石古樹披雲欲化龍
倚檻不嫌橫側看青天開出玉芙蓉

靈仙一掌拍空虛化作奇煙日卷舒玉井忽開明祖夢
金天難答衛公書聲通帝座人誰到氣壓河流帶不如
我欲秋風涼冷後蒼龍背上結茅居

冠萊公墓

御蓋忽上澶州城蒿呼動地聲雷鳴孤注一擲得全朵

萊公手眼原分明不爾六飛走楚蜀豈待高宗棄兩京
功高謗速易媒蘖好剛使氣微驕矜癭相何嘗是裴度
文皇早已知魏徵建儲三言決大計宰相進賢不用例
大節無慚社稷臣廷辯翻輸雀鼠智張詠臨歧教讀書
魏野修牋勸避位天書但解獻朱能犢車詎料藏丁謂
蒸羊遠餉拂鬚兒閉門縱博如當時蠟淚成堆醒大夢
犀帶束腰知死期欲拜華州相公墓請讀皇祐旌功碑

驪山懷古

龍槩伏流餘禍水皇堂石井驪山裏情波動宕長生殿
離宮壓斷新豐市朝朝祓禊如三春五隊靚妝皆麗人
遺鈿墜舄香滿路艷說諸姨朝至尊諸姨未足當人主

傾城別有霓裳舞嬌嗔繡嶺少瓊花笑倩三郎撾羯鼓
天子無愁却有愁平章風月少全謀斛去明珠慰寂寞
翦來鬢髮縈離憂覆水重收愈珍惜鮮紅荔子映顏色
但欲老死溫柔鄉誰知生訣馬嵬驛犬戎致寇申侯知
落葉哀蟬武帝思雪棧愁攀白衛嶺金錢悔洗赤心兒
君不見三臺麗似華清宮香渠更比溫湯濃浴室雖清
腸胃濁生兒尚欲殺乃公如何繡襖寵驕子艾豕乘勢
變成龍

關中懷古

鐘鼓聲中引鳳皇干戈影裏唱鷹揚三監借口援文考
十亂同心有邑姜頑惑雖然煩誥誡才難畢竟亞虞唐

征誅禮樂餘何物畢郢原頭宿草荒

東遷不待歷弧謠黃竹淒涼王氣銷駿馬縱遊天子毫
烽煙戲弄美人嬌供輸已見諸侯困一笑誰知九鼎搖
太息宗周行邁處故宮禾黍雨瀟瀟

長城無恙祖龍死射海鞭山竟若何封建不修亭長貴
井田初壞輟耕多焚書漫笑師儒腐逐鹿爭讐律令苛
約法三章君信否有人歸唱大風歌

楚人真是沐猴冠晝錦還鄉強自寬似讓三秦資赤帝
從教十世住長安金城進說移都易玉玦當時會意難
垓下烏騅莫惆悵漢陵風樹亦闌珊

百二河山據上游獨開東面制諸侯功成左袒纔安漢

禍釀中宮竟易劉寡婦迴心悲帝廟新朝藉手竊神州
黃貂不著稱文母可異金輪號改周

蒲津飛渡螯頭蛇射雁樓中日影斜誰煮麴糜供玉食
好修桑版署官衙登陴守死千人在袖手勤王四郡奢
記得長安故天子出降仍坐舊羊車

自謂蕭曹命世雄當年桀驁匹劉聰無端醉漢騎生馬
更值征塵簸大風三老諷譏何以健重門盟誓諒難同
朱絲束縛肥如瓠早在澄公指掌中

草付居然起畧陽羣氏興滅是龍驤武侯端合封王猛
司隸無難許鄧羌莫把風雲借讐敵猶傳正朔念荆揚
如何百萬投鞭走匹馬匆匆出五將

夢裏陰兵漫乞憐龍驤建業本持堅蕭牆格鬪驚羣雀
渭水蒙衝駭客船關內降王仍被戮江南宮樹欲生煙
誰知太尉還師日冷眼窺邊有赫連

紛紛元魏有西東但道關中勝洛中何事熒星催下殿
多情明月照彎弓戈矛倒授人誰肯湯火難分路太窮
盡力東征還服事文王真合諡周公

黑獺當年欲化龍升天不至亦英雄兵從沙苑蘆花起
馬逸芒山霧雨中扶背有人師丑父掉頭何處笑丁公
平生遠出齊神武只在周官復古功

總管營謀作天子阿麼終始在雷陂龍舟殿脚餘驍果
水飾圖經導宴嬉死慕江南陳叔寶生誅隴右李洪兒

心知堂詩集卷十
清游未厭逃西閤豈獨唐公有義旗

楊花飄蕩李花榮貞觀年中致太平突厥近邊宜北伐
高驪隔海又東征殊方職貢圖王會一代繁華詠帝京
詎料皇孫傷燕啄金龜換鯉是傾城

開元天寶幾何時治亂無端祇自知殿上牙籤金鑑錄
宮中繡褱赤心兒祠官遣祀終何益羯面來朝竟不疑
想見吞聲杜陵老繁華消歇曲江池

心知堂詩稿卷十一

成都汪仲洋少海

入棧集下

起己巳九月迄十月道中作

楊妃墓

居民常於墓上揀得白土號貴妃粉婦女以之瑩面頗增媚也

霓裳曲裏幾黃昏不復金釵挂月痕
丹荔未完妃子笑粉花分揀美人魂
歌成絕調餘長恨願結他生莫更論
解道傾城翻殉國纔知禍本是情根

磻溪

六鼇含餌上磻溪便是飛熊入夢時
寄語嚴陵諸後輩釣竿無事莫輕持

寶雞城外望棧中諸山

車輪輾輾路三千故國雲烟落眼前不識山從何處入
肩輿明日上青天

入益門鎮

閣道上冥冥秋風冷畫屏樹連天獄黑雲斷石門青驛
路爭嘗險吟鞭肯暫停歸途心歷歷不問短長亭

自和尚原至大散關

盤雲開鳥道細路裊如絲草木有餘險山川工用奇金
人悲會戰魏將悔窮追得失緣形勢兵家待語誰

煎茶坪

磴道登峩峩盤空不得已時作絕頂想更有峰巒起雲
輭不受踏瀉地如流水直愁天路窮墮空悲遊子東連

太白頭西接隴坂尾，鷲鷲從南飛。陳寶方北峙，四面奔騰來。一氣沈煙底，瞰空數高下。羅列猶在几，去天只一握。罡風吹過耳，欲歌行路難。羣仙笑下里。

宿黃牛堡夢魯輿賦寄

不盡英雄氣，都無兒女情。臨歧漫分手，回首欲吞聲。熱淚澆奇夢，悲歌記至情。爾來形落落，肝膽向誰傾。

自草涼驛至柳樹灣

一徑緣山腹，曲折六十里。上戴將崩巖，下臨不測水。峭壁忽斷路，南北隔行李。排木成偏橋，橫空度游子。雨穿風蕩搖，破壞洞見底。失足防偶然，魂魄欲先死。馬意不輕踏，厯亂擺雙耳。傍巖驅一鞭，雷聲四蹄起。數轉見村

落周道忽如砥遙遙望鳳州柳煙淺深裏

自鳳嶺至心紅峽

南出岐南城逶迤跋層嶺登頓無鈎梯援接乏垂綆環
腰如橐駝一步一引領高高上無極行脚亦何猛去天
尺五遙但覺氣空迴左手摘瓠瓜右手探參井丹穴朝
日開翠嶂冒煙挺巖壑低開張雲海浩千頃南望訝沈
黑撐天衆峰冷幸非途所經轉愛飛嵐影低頭下山麓
峽壁入幽靜繡繪所難到草木緣巖引染秋有淺深五
色不能盡安得彌月畱尺寸窮奇境朝餐心紅峽暮宿
鳳皇頂

廢邸懷古

蜀相驅流馬陳倉餉六師冥心生造化餘藝出神奇鼎
足中興後銖分末造時沔陽祠咫尺忠藎石琴知

將至南星道中

時見雲飛來時見雲飛去峭壁有人家不知出入處
懸巖數洞穴著足知何處風雨夜深時飛仙自來去

紫柏山

雲氣接天白不知當面山長風忽中裂一綫開煙巒隱
隱露叢木遙遙聽奔泉交柯互積雪絕澗迴寒煙得一
失八九耳目紛茫然撥雲踏石磴隨風尋翠鬢沈陰鬱
飛雨撲面爭廉纖隔手渾不辨徒御驚相旋身在白雲
裏心空碧峰巔崖洞七十二處處皆飛仙我欲借一榻

八知堂詩集卷十一
三
掃雲終日眠辟穀殊不耐願結山水緣

小畱壩

日見南歸雁鄉心不住催踏開青玉峽飛上翠雲臺客
路隨山轉人煙破雨來此行剛十月應折隴頭梅

畱壩

我昔從南來此間得小住時當兵火餘居民不相顧城
郭破飛礮樓閣臥行路長鎗叢敗垣瘡痍紛無數隊馬
蹂生民血想流水沍不知狂賊心云何有餘怒百家存
二三茅蓬結故處安土良重遷舍死不能去孤兒悲望
雲寡婦泣行露觸目紛慟心援手愧無具別來今五年
重向此間度生齒亦已繁人家聚煙樹未問賢有司誰

何善調護版築成新城倚險殊不誤長歌棧道平不用
官軍戍

連理樹

連理亭連理樹花開花落不知愁春來春去長如故枝
枝葉葉相抱持風風雨雨忘朝暮我欲爲作連理歌生
離死別愁懷多草木有情人奈何

自青羊橋至馬道驛

一過青羊橋巖巒竟何似其麓如朽木其壁如端綺其
峰如飛雲其壑如枯髓瀑布分流處山骨白於水想當
飛泉來萬派碧煙裏不知花與木彩錯紛無已不知禽
與獸號鳴莫肯止僕夫嗟路難高下踏石齒而我與爲

力與中時臥起逶迤百里間
差喜及村市亦欲就枕眠
溪聲聒人耳

由雞頭隘至褒城

游仙夢裏揀詩才隴上梅花笑我回路本盤雲
窺鳥度人隨流水破山來
衣邊雨氣千峰合眼底晴煙萬井開
熟客不須重問古褒城南是漢王臺

客裏風塵路五千故鄉初近便欣然
褒中女照秦時月漢上人彈蜀國弦
北棧雲山接南棧東川煙樹似西川
雞關馬塞遙相望纔下青天又上天

漢中

秦蜀咽喉古戰場南通劍閣北陳倉
樓船煙水連襄鄧

鳥道風雲接罕羌百尺將壇餘壯氣千年天獄幾眞王
興亡楚漢無多日尚有隆中策短長

沔陽觀武侯石琴并述近事作歌

我聞諸葛行軍之鍋猶刁斗中有水火氣相守又聞諸
葛雞鳴之枕隨宵更中有機關聲自鳴朽腐神奇不可
以理格豈獨木牛流馬解供役埋山尚憶鼓爲銅譜曲
誰知琴是石光如月含暈色如雲堆墨其形如半圭其
質如積鐵上圓下方中四空星星一竅開鴻濛不知神
工鬼斧秘從何處施匠巧但覺以手扣之鏗然應節聲
枯桐想當月白風清四山靜綸巾羽扇調黃鍾我心憂
國不可寫迸落七絃哀怨中嗚呼大雅久不起神靈在

天有如水妖氛尚憶五斗米風刀雨矢鼓聲裏是時沔
上百萬生靈無所奔哭向定軍依墓門煙荒日落連山
昏飛空黑氣翻車輪磨牙貔貙饑尋人勢欲捲地來噬
吞歟然雷礮擘空蕩一綫神光生墓上須臾碎散爲流
星百千萬億燦相望江干八陣圖中石起立如人皆持
仗金戈鐵馬紛然間似見我侯指揮狀諸民羅拜呼侯
來羣賊驚跳翻身回羣凶狼狽大兵集八戰八捷殲渠
魁一朝烽火息行路石上琴聲澹如故欲聽當年梁父
吟試向祠堂經宿住

重過五丁峽

天地有奇氣山川相吐吞如何五力士引手鑿雲根峻

峭壁雙壁崕岬開一門險絕記疇昔過此驚心魂怪石
有餘怒橫空壓行人大於數間屋破壞時欲崩果見飛
雲墜竟作臥虎蹲盤旋上石背摩挲摧落痕聞當雨連
夜衆流爭峽喧下有潛蛟窟蟠屈不得申掉尾裂雲出
昂頭穿石奔居民與過客漂沒俱無存吁嗟伐蛟政居
官誰復論我行幸不值長歌還故園

五丁關

一入金牛道飛嵐撲面青中峰迴日月急峽走風霆導
水疑神禹開山想五丁杜鵑何處哭愁絕不堪聽

柏林驛舊有題壁小詩數首嚴麗生於報罷過此
繼題於後且繫以序情詞悱惻有淮南招隱之

意讀竟慨然感賦長句卻寄

麗生名學淦江蘓丹徒人

我是黃山三十六峰峰上雲長風卷送峨眉陰峨眉明月不相識排天元鶴來追尋翻身墮落塵劫裏一在江頭一江尾摩空習氣誰能除閉戶馳心輒萬里芙蓉花下相送迎分手更作天涯行巴船棹與蛟龍戰棧道馬同鷹隼爭入險出險長安來相看欲上黃金臺誰知一第之難如行路空餘胸中奇氣鬱勃如夔門劍閣不得驚靈鑿五丁開嵯岬汜濫勢何能已一氣吐之淋漓跌宕不知其所以君行與我亮如此我詩未得君爲削何時壁上拂塵喜君詩未知我爲讀當時藉從心吾子篋中尚有驪珠千牟尼一串光射天一日不見心茫然時

時與我相周旋吁嗟乎自古詩人不適用得失何足生
長歎坐恐錦袍玉帶相束縛使我不得逍遙放浪成神
仙君何不挹我袖我何不拍君肩海上散髮騎鯨去山
中掉臂抱虎眠

洄水河

漢水如白龍蜿蜒下雲際行人橫腰來步步踏龍背龍
背不可踏鱗甲怒開閉一甲一波濤水花紛破碎奔騰
徹晝夜涓滴潤天地念茲赴海情助我凌雲氣我本出
山人忽作還山計慷慨餘生才憂愁負世治有若山中
泉滌洄不得遂倒流尋故源進退都失勢何當神禹來
導成巨川濟

將至七盤關

地形相對斷秦蜀一關分綠澗撐紅樹青山逗白雲時
平邊戍滅秋盡野樵勤故國欣無遠鄉音入耳聞

龍洞背游龍洞作

飛空來獐龍掉尾有餘怒龍來水亦來龍住水不住白
雲開合間蜿蜒相迴顧翕然張巨口流水爭奔赴一氣
灌千古得吞不得吐吸川實豪縱尾閭從何注平生山
水癖未窮天外路有入定有出龍口踏雙屨黑白忽錯
道陰陽爭跬步一徑探幽冥涉險得奇趣崩巖摩頂來
驚濤瀉魂去未燃牛渚犀百靈紛無數山蘂與水魅撲
面爭駭怖慘慄長風來中有嘯聲助怪石如游人往往

相攜誤匍匐失去來怨悔及僕御不復辨何物著處成
牴牾四面雷霆轟知與流水互宛轉更鑿空忽見天光
露龍腰裂一綫尚非水泄處餘生出奇險未敢窮幽暮
自朝天峽放舟赴廣元

慨從京洛游衣上緇塵滿骯髒心目中俱若不得鹽干
里走雲棧頓覺氣蕭散驢背數青山詩思與之嬾殘夢
續不酣江聲忽撼斷渺渺挹流水一氣綠煙輾輕舸三
數來快比并州翦失喜呼舟人我亦弄清淺江心初空
曠峽口忽偃蹇洞天生面開圖畫游人展峭壁勢相錯
奔流聲欲轉層層青嶂來處處白雲卷迤東峰最高中
有閤門掩一綫羊腸路迴合入奇險憶我南來時接踵

八
卷
三
言
不
分
二
不
容
緩
低
頭
江
上
舟
凌
波
羨
欵
欵
往
來
異
水
陸
今
昔
殊
寒
暖
擊
楫
歎
游
人
故
里
今
不
遠

桔柏渡

欲
渡
棹
歌
起
浪
花
飛
滿
船
山
迴
三
尺
水
秋
盡
一
溪
煙
道
岸
憑
誰
引
浮
生
轉
自
憐
泡
渥
看
世
事
歸
去
枕
書
眠

重過牛頭山

我
昔
下
牛
頭
陰
雨
四
山
闕
半
壁
雲
茫
茫
俯
視
疑
平
地
倏
忽
穿
雲
行
空
濛
但
一
氣
始
訝
來
處
高
所
立
猶
雲
際
迷
離
踏
磴
道
不
知
何
處
既
及
茲
返
轡
來
晴
日
射
寒
翠
一
步
一
回
首
隔
嶺
數
歸
騎
愈
遠
愈
微
茫
蠕
蠕
黑
如
蚊
破
空
樓
閣
來
肩
輿
得
小
憩
憑
闌
瞰
遠
近
圖
畫
不
能
備
迺
有
緣
山
田

都作偃月勢層層山土平短短麥苗銳青煙籠赤霞高
下媚秋霽想當種稻時積水如雲膩一夜春雨深萬壑
明鏡麗肯讓嘉陵江白如雙帶繫良無買山錢但願時
一至不須飽黃粱收取入詩思

羅江道中

一綫羊腸劍外回掉頭猶見亂雲堆靈龕鎮外青山盡
瓦鼓聲中白雨來江水淺深穿隴畝竹煙疎密繞樓臺
官城十萬芙蓉樹應向秋風次第開

入棧諸詩彙成題後

素衣無故染風塵棧路連雲往返頻十萬青山題不盡
將詩讓與後來人